

LIGJ
Nr.10 346, datë 4.11.2010

**PËR DISA SHTESA DHE NDRYSHIME NË LIGJIN NR. 9874, DATË 14.2.2008 “PËR
ANKANDIN PUBLIK”**

Në mbështetje të neneve 78 e 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 9874, datë 14.2.2008 “Për ankandin publik”, bëhen shtesat dhe ndryshimet e mëposhtme:

Neni 1

Në nenin 3, pas pikës 13 shtohet pika 13/1 me këtë përmbajtje:

“13/1. “Komisioni i Prokurimit Publik” është institucioni i ngritur sipas ligjit nr.9643, datë 20.11.2006 “Për prokurimin publik”, të ndryshuar.”.

Neni 2

Në nenin 7 bëhen ndryshimet e mëposhtme:

1. Pika 1 ndryshohet si më poshtë:

“1. Mbikëqyrja e zbatimit të procedurave të shitjes me ankand bëhet nga Agjencia e Prokurimit Publik.”.

2. Në pikën 2 bëhen këto ndryshime:

a) Në shkronjën “b”, pas fjalëve “procedurave të ankandeve publike” shtohen fjalët “pas nënshkrimit të kontratës”.

b) Shkronja “ç” shfuqizohet.

c) Në shkronjën “d”, fjalët “vendos dhe” hiqen.

Neni 3

Në nenin 27 pika 1, fjalët “Agjencinë e Prokurimit Publik” zëvendësohen me fjalët “Komisionin e Prokurimit Publik”.

Neni 4

Në nenet 42 dhe 44 fjalët “Agjencia e Prokurimit Publik” dhe “Agjencia” zëvendësohen me fjalët “Komisioni i Prokurimit Publik” dhe “Komisioni”.

Neni 5

Pas nenit 42 të kreut VII “Procedurat e rishikimit administrativ” shtohet neni 42/1 me këtë përmbajtje:

“Neni 42/1

Organi kompetent për shqyrtimin e ankimeve

1. Shqyrtimi administrativ i ankesave të ofertuesve ndaj procedurave të ankandit apo vendimit

për përjashtim nga procedurat e ankandit, sipas shkronjës “d” të pikës 2 të nenit 7 të këtij ligji, bëhet nga Komisioni i Prokurimit Publik.

2. Komisioni i Prokurimit Publik, në përfundim të shqyrtimit të ankesave, merr vendime, të cilat janë administrativisht përfundimtare.

3. Rregulla të hollësishme për procedurën e shqyrtimit të ankesave ndaj procedurave të ankandit apo vendimeve për përjashtim nga këto procedura miratohen nga Këshilli i Ministrave.”.

Neni 6

Në nenin 42 bëhen këto ndryshime:

1. Në pikat 2, 4, 5 e 8, fjalët “brenda 5 ditëve” zëvendësohen me fjalët “brenda 7 ditëve”.

2. Në fjalinë e fundit të pikës 5, pas fjalëve “i dërgohet” shtohet fjala “detyrimisht”.

3. Në fund të fjalisë së parë të pikës 6, pas fjalëve “përshkrimi i shkeljes” shtohen fjalët “pretendimi i ankuesit për vendimin përfundimtar, shkallët e ankimit, shoqëruar me dokumentacionin përkatës dhe vendimin e autoritetit shitës”.

4. Në fund të pikës 7 shtohet fjalia me këtë përmbajtje:

“Autoriteti kontraktues i dërgon menjëherë informacion Komisionit të Prokurimit Publik, kur merr dijeni se ankesa i është paraqitur këtij Komisioni.”.

5. Pas pikës 8 shtohet pika 9 me këtë përmbajtje:

“9. Çdo ankesë në Komisionin e Prokurimit Publik bëhet kundrejt pagesës. Rregullat dhe tarifa e pagesës përcaktohen me vendim të Këshillit të Ministrave.”.

Neni 7

Neni 43 ndryshohet si më poshtë:

“Neni 43

Të drejtat e Komisionit të Prokurimit Publik

1. Me marrjen e ankesës me shkrim, Komisioni i Prokurimit Publik duhet të sigurohet që autoriteti shitës e ka pezulluar procedurën e ankandit. Pas një shqyrtimi paraprak të ankesës, Komisioni i Prokurimit Publik merr vendim nëse do të lëshojë ose jo një urdhër të ndërmjetëm, në përputhje me pikën 2 të këtij neni, dhe vë në dijeni për këtë autoritetin shitës.

2. Komisioni i Prokurimit Publik, në çdo kohë, pas marrjes së ankesës dhe para lidhjes së kontratës, kur nuk vendos pezullimin, mund ta lejojë autoritetin shitës, me anë të një urdhri të ndërmjetëm, deri në marrjen e një vendimi përfundimtar, të vazhdojë procedurën e ankandit, nëse:

a) ka të dhëna se ankimesi nuk do të ketë sukses me ankesën;

b) pezullimi dëmton tërthorazi interesin publik, autoritetin shitës ose ofertuesit.

3. Përpara lidhjes së kontratës, Komisioni i Prokurimit Publik, kur gjykon se një vendim apo veprim i autoritetit shitës ka shkelur ndonjë nga dispozitat e këtij ligji, ka të drejtë:

a) të nxjerrë një interpretim për rregullat ose parimet ligjore që duhet të zbatohen për objektin e ankesës;

b) të anulojë, plotësisht ose pjesërisht, një veprim ose vendim të autoritetit shitës, të nxjerrë në kundërshtim me ligjin. Kjo përfshin edhe të drejtën për të hequr të gjitha ato specifikime teknike ose llojet e tjera të specifikimeve që bien ndesh me këtë ligj;

c) të udhëzojë autoritetin shitës të korrigjojë shkeljet dhe më pas të vazhdojë me procedurën e lidhjes së kontratës;

ç) të urdhërojë anulimin e procedurave për shpalljen e kontratës fituese.

4. Pas lidhjes së kontratës, kur Komisioni i Prokurimit Publik gjykon se një vendim apo veprim i autoritetit shitës është në kundërshtim me ndonjë nga dispozitat e këtij ligji, ka të drejtë:

a) të nxjerrë një interpretim në lidhje me rregullat ose parimet ligjore që duhet të zbatohen për objektin e ankesës;

b) të marrë një vendim deklarativ, në bazë të të cilit pushteti gjyqësor mund të dëmshpërblejë

ankuesin që ka pësuar humbje ose dëme, si rezultat i shkeljes së këtij ligji;

c) të marrë masa ndaj personave përgjegjës, sipas parashikimeve në këtë ligj.

5. Kur Komisioni i Prokurimit Publik gjykon se një punonjës i autoritetit shitës ka kryer një shkelje të qëllimshme, që prek parimet dhe qëllimin e këtij ligji, përveç masave korrigjuese të parashikuara në pikat 1 deri në 4 të këtij neni, mund të bëjë kallëzim penal në organet përkatëse.”.

Neni 8

Pas nenit 43 shtohen nenet 43/1 e 43/2 me këtë përmbajtje:

“Neni 43/1

Procedura e rishikimit administrativ

1. Komisioni i Prokurimit Publik mund të fillojë një procedurë rishikimi administrativ kur i paraqitet ankesë nga persona të interesuar për procedura ankandi.

2. Gjatë rishikimit administrativ, Komisioni i Prokurimit Publik ka të drejtë:

a) t'u kërkojë palëve dokumentacion ose të dhëna, për të mbështetur pretendimet e tyre;

b) të kërkojë të dhëna e shpjegime nga çdo organ i administratës qendrore dhe vendore, si dhe të marrë çdo dosje apo material që ka lidhje me hetimin administrativ;

c) të marrë në pyetje çdo person që, sipas tij, është i lidhur me procedurën e rishikimit;

ç) të kërkojë ekspertizat përkatëse nga ekspertë të palëve të treta.

3. Komisioni i Prokurimit Publik ka të drejtë të caktojë një afat për përgjigjen ndaj kërkesave të tij për të dhënat dhe për dorëzimin e dokumenteve përkatëse, sipas legjislacionit që rregullon procedurat administrative.

Neni 43/2

Vendimet e komisionit të prokurimit publik

1. Pas përfundimit të shqyrtimit administrativ, Komisioni i Prokurimit Publik mund të marrë këto vendime:

a) të pushojë gjykimin, duke qenë se veprimet ose mosveprimet e autoritetit shitës, që ka realizuar procedurën e ankandit, nuk përbëjnë shkelje të këtij ligji ose të dispozitave administrative apo penale. Në këtë rast, Komisioni i Prokurimit Publik i sqaron, me shkrim, ankimuesit arsyet për pushimin e gjyimit;

b) t'i japë autoritetit shitës, të përfshirë, një vendim me shkrim, për të ndalur sjelljen e jashtëligjshme, brenda një afati të caktuar kohor.

2. Autoritetet shitëse duhet të zbatojnë vendimin e dhënë ose të kërkojnë rishikimin e vendimit të Komisionit të Prokurimit Publik brenda 10 ditëve nga marrja dijeni për vendimin. Nëse këto veprime i kanë sjellë efektet e tyre, atëherë Komisioni i Prokurimit Publik u këshillon personave të dëmtuar të ngrenë padi në gjykatë ose të bëjnë kallëzim penal.

3. Nëse Komisioni i Prokurimit Publik gjykon se një zyrtar i autoritetit shitës ka kryer një shkelje të qëllimshme të këtij ligji, atëherë ia raporton shkeljen autoritetit përkatës.”.

Neni 9

Në nenin 44 bëhen ndryshimet e mëposhtme:

1. Në fjalinë e parë të pikës 1, fjalët “në Gjykatën e Rrethit Gjyqësor, Tiranë” zëvendësohen me fjalët “në gjykatën kompetente”.

2. Fjalja e dytë e pikës 1 hiqet.

Neni 10

Dispozita kalimtare

1. Pas hyrjes në fuqi të këtij ligji, ankesat ndaj procedurave të ankandit bëhen në Komisionin e Prokurimit Publik.

2. Komisioni vazhdon shqyrtimin e ankesave të paraqitura pranë Agjencisë së Prokurimit Publik, në gjendjen në të cilën ato ndodhen.

3. Shqyrtimi i ankesave ndaj procedurave të ankandit nga Komisioni i Prokurimit Publik fillon pas hyrjes në fuqi të këtij ligji.

Neni 11

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

**Shpallur me dekreten nr.6770, datë 15.11.2010 të Presidentit të Republikës së Shqipërisë,
Bamir Topi**